

შპს “მობიტელ”-ის

მოწვევის ოფერტა

ძირითადი ქსელის საკომუნიკაციო ტერმინალურ ელემენტებთან დაშვებისა და ურთიერთჩართვის (სატელეფონო ზარების წამოწყება/დასრულების) მომსახურების შეთავაზების წინადადება

1. ძირითადი ქსელის საკომუნიკაციო ტერმინალურ ელემენტებთან დაშვების და ურთიერთჩართვის (სატელეფონო ზარების წამოწყება/დასრულების) მომსახურების მიწოდების მისამართები

- ა) ქ. თბილისი, ფარნავაზის ქუჩა №6 ბ) ქ. თბილისი, რუსთაველის გამზ. №31
- გ) ქ. ქუთაისი წერეთლის ქუჩა №186 დ) ქ. ბათუმი აღმაშენებლის ქუჩა №13

2. ურთიერთჩართვის წერტილში ტექნიკური საშუალებების გამოყენებული ინტერფეისების აღწერილობა

ურთიერთჩართვის წერტილებში გამოყენებული ინტერფეისებია:

- 703, SS7 სიგნალიზაცია

3. ძირითადი ქსელის საკომუნიკაციო ტერმინალურ ელემენტებთან დაშვებისა და ურთიერთჩართვის (სატელეფონო ზარების წამოწყება/დასრულების) ტარიფები

- მობილურ ქსელში ურთიერთჩართვის (ზარის წამოწყება/დასრულების) ტარიფი –
2014 წლის 01 მარტიდან - 7 თეთრი/წთ, დღგ-ს და აქციზის ჩათვლით
2014 წლის 01 სექტემბრიდან - 5 თეთრი/წთ, დღგ-ს და აქციზის ჩათვლით
2015 წლის 01 მარტიდან – 4 თეთრი/წთ, დღგ-ს და აქციზის ჩათვლით
2015 წლის 01 სექტემბრიდან – 3.5 თეთრი/წთ, დღგ-ს და აქციზის ჩათვლით
- ტრანზიტული გატარების ტარიფი საქართველოს ტერიტორიაზე – 1 თეთრი/წთ, დღგ-ს ჩათვლით

4. ანგარიშსწორების პირობები

4. ანგარიშსწორების პირობები

4.1. ანგარიშსწორების პირობები იყოფა რამდენიმე კატეგორიად, კერძოდ:

4.1.1. ანგარიშსწორების პირობები იმ ავტორიზებულ პირებთან, რომლებიც საქართველოს კომუნიკაციების ეროვნული კომისიის შესაბამისი გადაწყვეტილების საფუძველზე ცნობილი არიან მნიშვნელოვანი საბაზრო ძალაუფლების მქონე პირებად ძირითადი ქსელის საკომუნიკაციო ტერმინალურ ელემენტებთან დაშვებისა და ურთიერთჩართვის (სატელეფონო ზარების წამოწყება/დასრულების) მომსახურების ბაზრის სეგმენტ(ებ)ზე

ან/და ბოლო 12 თვის განმავლობაში „მობიტელთან“ იმყოფებიან ან/და იმყოფებოდნენ სახელშეკრულებო ურთიერთობაში (იღებდნენ მომსახურებას „მობიტელისგან“) და არ აქვთ დარღვეული ფინანსური ვალდებულებები/ჯეროვნად ასრულებენ ფინანსურ ვალდებულებებს ან/და მათ მიერ ფინანსური ვალდებულებები 12 თვის განმავლობაში დარღვეულია მხოლოდ ორჯერ. ყოველგვარი გაუგებრობის გამოსარიცხად, ფინანსური ვალდებულების ჯეროვნად შესრულებაში იგულისხმება დადგენილ ვადაში (მათ შორის, „მობიტელის“ მიერ მოთხოვნილ ან/და „მოწვევის ოფერტაში“ განსაზღვრულ ვადაში) „მობიტელის“ მიერ გაწეული მომსახურების საფასურის ან/და ანგარიშ-ფაქტურით მოთხოვნილი თანხის სრულად გადახდა.

4.1.2. ანგარიშსწორების პირობები იმ ავტორიზებულ პირებთან, რომლებიც ბოლო 12 თვის განმავლობაში „მობიტელთან“ იმყოფებიან ან/და იმყოფებოდნენ სახელშეკრულებო ურთიერთობაში (იღებდნენ მომსახურებას „მობიტელისგან“) და სულ მცირე ორჯერ აქვთ დარღვეული ფინანსური ვალდებულებები. ყოველგვარი გაუგებრობის გამოსარიცხად, ფინანსური ვალდებულების დარღვევაში იგულისხმება დადგენილ ვადაში (მათ შორის, „მობიტელის“ მიერ მოთხოვნილ ან/და „მოწვევის ოფერტაში“ განსაზღვრულ ვადაში) „მობიტელის“ მიერ გაწეული მომსახურების საფასურის ან/და ანგარიშ-ფაქტურით მოთხოვნილი თანხის გადაუხდელობა ან/და არასრულად გადახდა (ფინანსური ვალდებულების არაჯეროვანი შესრულება);

4.1.3. ანგარიშსწორების პირობები იმ ავტორიზებულ პირებთან, რომლებიც წინამდებარე „მოწვევის ოფერტის“ პირობების შესაბამისად პირველად ითხოვენ შესაბამისი ხელშეკრულების გაფორმებას ძირითადი ქსელის საკომუტაციო ტერმინალურ ელემენტებთან დაშვებასა და ურთიერთჩართვის (სატელეფონო ზარების წამოწყება/დასრულების) მომსახურებაზე.

4.2. 4.1.1 პუნქტით განსაზღვრულ პირებთან ანგარიშსწორების პირობები განსაზღვრულია ქვემოთ მოცემული პირობების შესაბამისად, კერძოდ:

4.2.1. მხარეებს შორის ანგარიშსწორება წარმოებს ყოველთვიურად. ანგარიშსწორება მხარეთა შორის ხორციელდება გაწეული მომსახურებების შესახებ შედარების აქტის საფუძველზე, სრული მოცულობით, არაუგვიანეს საანგარიშო თვის მომდევნო თვის 25 რიცხვისა.

4.2.2. შედარების აქტში აღნიშნული უნდა იყოს მომსახურების სახეები, ინფორმაცია ტრაფიკის შესახებ წამობრივი დამრგვალებით, მხარეთა კუთვნილი თანხები და საბოლოოდ გადასახდელი თანხა. მხარეები ერთმანეთს ელექტრონული ფოსტის გამოყენებით უგზავნიან ინფორმაციას მათ მიერ გაწეული მომსახურების შესახებ (გაწეული მომსახურების სახის, მისი ოდენობისა და საფასურის მითითებით) არაუგვიანეს საანგარიშო თვის მომდევნო თვის 10 რიცხვისა (“მობიტელისთვის” მონაცემების მიწოდება ხდება ელექტრონული ფოსტის მისამართზე **billing@beeline.ge**). მეორე მხარის მიერ მონაცემების დროულად არ წარმოდგენის შემთხვევაში გაწეული მომსახურებების შესახებ შედარების აქტის შედგენა ხდება “მობიტელის” მონაცემების საფუძველზე. “მობიტელი” გაწეული მომსახურებების შესახებ შედარების აქტს მეორე მხარეს უგზავნის არაუგვიანეს საანგარიშო თვის მომდევნო თვის 15 რიცხვისა (მათ შორის, შესაძლებელია შედარების აქტის ელექტრონული სახითაც გაგზავნა), ხოლო მეორე მხარე თავისი მხრიდან ხელმოწერილ ამავე შედარების აქტის ერთ ეგზემპლარს “მობიტელს” უბრუნებს არაუგვიანეს საანგარიშო თვის მომდევნო თვის 20 რიცხვისა.

4.2.3. შედარების აქტის გაფორმებისას მხარეთა შორის შესაძლებელია წარმოიშვას წინააღმდეგობა მათ მიერ გაწეული მომსახურებების ოდენობებზე. ორპარტიულობის თავიდან აცილების მიზნით, წინააღმდეგობა მხარეების მიერ წარმოდგენილ მონაცემებს შორის არსებობს მხოლოდ მაშინ, როდესაც ერთ-ერთი მხარე წერილობითი ფორმით და წინამდებარე პუნქტის მიხედვით დადგენილი პირობების დაცვით მეორე მხარეს წარუდგენს გადაანგარიშების მოთხოვნას შედარების აქტის წარდგენიდან არაუგვიანეს 5 სამუშაო დღის ვადაში. მხარის მიერ გადაანგარიშების მოთხოვნაში დაფიქსირებული

უნდა იყოს დარიცხული თანხის რა ნაწილის ეთანხმება იგი და რას არა, რა საფუძველით ხდის სადაოდ დარიცხულ თანხას. ასევე, გადაანგარიშების მოთხოვნას თან უნდა დაერთოს ყველა ის დოკუმენტი, თუ სხვა სახის მტკიცებულება, რომელიც ადასტურებს მხარის მოთხოვნის საფუძველიანობას.

4.2.4. 4.2.3. პუნქტით განსაზღვრულ შემთხვევაში, თუ არსებობს წინააღმდეგობა მხარეების მიერ წარმოდგენილ მონაცემებს შორის, ანგარიშსწორება იწარმოებს ორმხრივად შეთანხმებულ ანუ არასადაო ნაწილზე, ხელშეკრულებით დადგენილ ვადებში. მეორე მხარე "მობიტელს" აწვდის სადაო თვის სასადაგურო ჩანაწერებს და სხვა საჭირო მონაცემებს. გადაანგარიშების მოთხოვნის მიღებიდან 2 სამუშაო დღის ვადაში შეუთანხმებელ ნაწილზე მხარეები ქმნიან ერთობლივ კომისიას, რომელიც 20 (ოცი) სამუშაო დღის ვადაში სწავლობს მხარეთა მიერ წარმოდგენილ შესაბამის დოკუმენტაციას და უზრუნველყოფს შეუთანხმებელი ნაწილის შეთანხმებას. ანგარიშსწორება განხორციელდება შეთანხმების ოქმის საფუძველზე ოქმის შედგენიდან 5 (ხუთი) სამუშაო დღის ვადაში. იმ შემთხვევაში, თუ მხარეები ვერ მიაღწევენ შეთანხმებას თითოეული უფლებამოსილია მიმართოს საქართველოს კომუნიკაციების ეროვნულ კომისიას ან/და სასამართლოს. იმ შემთხვევაში, თუ მხარე უმიზეზოდ უარს ამბობს ოქმის ხელმოწერაზე ან/და შეგნებულად ხელს უშლის ერთობლივი კომისიის მუშაობას, "მობიტელი" ურთიერთჩართვის მომსახურების საფასურის სრული ოდენობით მისაღებად უფლებამოსილია შეწყვიტოს ან/და შეაჩეროს მომსახურების გაწევა კანონმდებლობით დადგენილი წესის შესაბამისად.

4.2.5. ყველა სხვა შემთხვევაში (მათ შორის, როდესაც ერთ-ერთი მხარე არ აწერს ხელს შედარების აქტს), ანგარიშსწორება იწარმოებს "მობიტელის" მიერ „კომპანიისადმი“ წარდგენილი გაწეული მომსახურებების შესახებ შედარების აქტში დაფიქსირებული თანხების სრული ოდენობით წინამდებარე ოფერტითა და ხელშეკრულებით გათვალისწინებული ვადებისა და პირობების შესაბამისად.

4.3. 4.1.2 და 4.1.3 პუნქტით განსაზღვრულ პირობებთან ანგარიშსწორების პირობები განსაზღვრულია ქვემოთ მოცემული პირობების შესაბამისად, კერძოდ:

4.3.1. ურთიერთჩართვის მსურველი ავტორიზებული პირი ვალდებულია წინასწარ, ურთიერთჩართვის ხელშეკრულების გაფორმებამდე ან/და გაფორმების შემდეგ წერილობითი ფორმით წარუდგინოს (თვის დასაწყისამდე) „მობიტელს“ ყოველთვიური სავარაუდო პროგნოზი (შემდგომში - პროგნოზი), მის მიერ „მობიტელის“ ქსელში ან/და მისი ქსელის მეშვეობით დასასრულებელი/დასატერმინირებელი წუთების ოდენობის შესახებ.

4.3.2. ავტორიზებული პირის მიერ 4.3.1 პუნქტის მიხედვით გაკეთებული პროგნოზი წარმოადგენს მის მიერ „მობიტელისთვის“ წინასწარ, ავანსის ან/და მის მიერ ყოველთვიური ფინანსური ვალდებულების შესრულების უზრუნველსაყოფად წარმოსადგენი/წარმოდგენილი საბანკო გარანტიის თანხის გამოანგარიშების ძირითად საფუძველს.

4.3.3. ავტორიზებული პირი უფლებამოსილია თავად განსაზღვროს/შეარჩიოს „მობიტელის“ წინაშე მის მიერ ნაკისრი ყოველთვიური ფინანსური ვალდებულების შესრულების უზრუნველყოფის საშუალებებიდან (ავანსი, საბანკო გარანტია) მისთვის ხელსაყრელი საშუალება.

4.3.4. ავტორიზებული პირი ვალდებულია ყოველდღიურად აკონტროლოს მის მიერ „მობიტელისაგან“ მისაღები/მიღებული ურთიერთჩართვის მომსახურების მოცულობა;

4.3.5. ავტორიზებული პირი ვალდებულია დაუყონებლივ გადაუხადოს „მობიტელს“ მიღებული ურთიერთჩართვის მომსახურების ღირებულება, თუ გაწეული მომსახურების ღირებულება გაუტოლდება ავტორიზებული პირის მიერ წარდგენილი საბანკო გარანტიით გათვალისწინებულ თანხას ან/და სრულად გაიხარჯება ავანსის სახით გადახდილი თანხა;

4.3.6. ყოველგვარი გაუგებრობის გამოსარიცხად, 4.1.2 და 4.1.3 ქვეპუნქტებით განსაზღვრულ პირებზე ასევე ვრცელდება 4.2.2-4.2.5 ქვეპუნქტებით გათვალისწინებული ვალდებულებები. გამონაკლისს წარმოადგენს ის დებულებები, რომლებიც წინააღმდეგობაში მოდის 4.3 პუნქტით განსაზღვრულ ანგარიშსწორების პირობებთან.

4.3.7. ყოველგვარი გაუგებრობის გამოსარიცხად, 4.1.2 და 4.1.3 პუნქტით განსაზღვრული ავტორიზებული პირების მიერ „მობიტელისაგან“ მიღებულ ურთიერთჩართვის მომსახურებაზე თანხების გადახდის ვალდებულება ჯეროვნად შესრულებულად ითვლება მხოლოდ იმ შემთხვევაში და იმ დღიდან, როდესაც ავტორიზებული პირის მიერ გადახდილი თანხა აისახება/ჩაირიცხება „მობიტელის“ საბანკო ანგარიშზე ან/და „ავტორიზებული პირის მიერ „მობიტელისთვის“ წარდგენილია თანხის გადახდის დამადასტურებელი დოკუმენტი (დადგენილი წესით დადასტურებული საბანკო დაწესებულების მიერ).

4.4. ანგარიშსწორება ხორციელდება ყველა განხორციელებულ ზარზე, მიუხედავად ზარის წამომწყები აბონენტის ადგილმდებარეობისა. „მობიტელის“ მიერ განხორციელებული ზარების დამრგვალება ხდება ერთი წამის სიზუსტით.

4.5. მხარეები კისრულობენ ვალდებულებას მათ მიერ გაწეულ მომსახურებაზე მოახდინონ მეორე მხარისათვის დღგ-ს ანგარიშ-ფაქტურის წარდგენა საქართველოს საგადასახადო კოდექსის შესაბამისად, მიუხედავად იმისა, არსებობს თუ არა წინააღმდეგობა მხარეების მიერ წარმოდგენილ მონაცემებს შორის.

5. არაპირდაპირი ურთიერთჩართვის პირობები

„მობიტელ“-თან არაპირდაპირი, ტრანზიტული კავშირის ოპერატორის საშუალებით ჩართვის შემთხვევაში, „მობიტელ“-თან არაპირდაპირ ურთიერთჩართული ოპერატორი უზრუნველყოფს ყველა სატრანზიტო ხარჯის დაფარვას, მათ შორის, მისი ქსელიდან წამოწყებული და „მობიტელ“-ის ქსელში დასრულებული, აგრეთვე „მობიტელ“-ის ქსელიდან წამოწყებული და მის ქსელში დასრულებული ზარების სატრანზიტო მომსახურების საფასურის გადახდას.

6. საკომუნიკაციო ტერმინალურ ელემენტებთან დაშვებისა და ურთიერთჩართვის (სატელეფონო ზარების წამოწყება/დასრულების) მომსახურების მიწოდებაზე, მსურველი პირისგან აქცეპტის თაობაზე განაცხადის განხილვის პირობები და პროცედურები

6.1. ურთიერთჩართვის ხელშეკრულების დადების მსურველი პირი წერილობითი ფორმით, განაცხადით მიმართავს „მობიტელს“ (განაცხადი ბარდება „მობიტელს“ ცენტრალურ ოფისში, მისამართზე: ქ. თბილისი, გორგასლის ქ.№8 (მტკვრის მარჯვენა სანაპირო))

6.2. განაცხადში მითითებული უნდა იყოს ურთიერთჩართვის გასახორციელებლად აუცილებელი ინფორმაცია, მათ შორის: ავტორიზებული პირის ქსელის აღწერა, სავარაუდო ტრაფიკის მოცულობა (პროგნოზი), სიგნალიზაციის ტიპი, გამოყენებული ინტერფეისი, ურთიერთჩართვის მსურველი პირის მომსახურების სახეები და ტარიფები, ელექტრონული ფოსტის მისამართი და სხვ...

6.3. განაცხადთან ერთად ავტორიზებული პირი ვალდებულია წარმოადგინოს:

ა) მოთხოვნილ მომსახურებაზე ავტორიზაციის დამადასტურებელი დოკუმენტი, გაცემული საქართველოს კომუნიკაციების ეროვნული კომისიის მიერ;

ბ) ამონაწერი სამეწარმეო რეესტრიდან;

გ) უფლებამოსილი პირის პირადობის მოწმობის ასლი;

დ) გასააქტიურებელი ნუმერაციის რესურსის სალიცენზიო მოწმობის ასლი ან/და

ნებართვის ასლი ან/და სხვა დოკუმენტი, რომელიც ადასტურებს განმცხადებლის მიერ

ნუმერაციის ფლობის ფაქტს;

ე) წინამდებარე ოფერტის მიხედვით წარმოდგენილ განაცხადში დაფიქსირებული უნდა იყოს განმცხადებლის დასტური რომ იგი გაცნობილია, ეთანხმება და უპირობოდ შეასრულებს წინამდებარე ოფერტაში დაფიქსირებულ ყველა პირობას;

ვ) განმცხადებლის მიერ „მობიტელის“ წინაშე შესასრულებელი ფინანსური ვალდებულების უზრუნველყოფის საშუალებიდან ერთ-ერთი, კერძოდ:

- გამოუხმობადი საბანკო გარანტია, რომლის მოქმედების ვადა სულ მცირე უნდა აღემატებოდეს ორ თვეს. აღნიშნული საბანკო გარანტია იქნება „კომპანიის“ მიერ “მობიტელის“ წინაშე ნაკისრი ფინანსური ვალდებულების შესრულების უზრუნველყოფის საშუალება. საბანკო გარანტიის ოდენობა დამოკიდებულია განმცხადებლის მიერ „მობიტელის“ ქსელში დასატერმინირებელი/დასასრულებელი წუთების რაოდენობაზე/ღირებულებაზე, რომელიც ასახული უნდა იყოს განმცხადებლის მიერ გაკეთებულ „პროგნოზში“. ამასთან, წინამდებარე გარანტიასთან დაკავშირებული ნებისმიერი ხარჯის (მათ შორის, ღირებულება, საკომისიო და ა.შ.) გაწევას უზრუნველყოფს განმცხადებელი;
- “მობიტელის” საბანკო ანგარიშზე (რომელსაც მობიტელი მიაწოდებს წინასწარ) ავანსის ჩარიცხვის დამადასტურებელი ქვითარი. ზემოთაღნიშნული ავანსის ოდენობა დამოკიდებულია განმცხადებლის მიერ „მობიტელის“ 6 ქსელში ან/და მისი გავლით დასატერმინირებელი/დასასრულებელი წუთების რაოდენობაზე/ღირებულებაზე, რომელიც ასახული უნდა იყოს განმცხადებლის მიერ გაკეთებულ „პროგნოზში“. ამასთან, წინამდებარე ავანსთან დაკავშირებული ნებისმიერი ხარჯის (მათ შორის, გადარიცხვის საკომისიო და ა.შ.) გაწევას უზრუნველყოფს განმცხადებელი;

6.4. განმცხადებელს განაცხადის გაკეთების მომენტისათვის არ უნდა გააჩნდეს „მობიტელის“ წინაშე შესასრულებელი ფინანსური ვალდებულება (დავალიანება).

შენიშვნა: განმცხადებელი ვალდებულია შეასრულოს წინამდებარე ოფერტის 4.8 პუნქტის ვ) ქვეპუნქტის მოთხოვნა მხოლოდ იმ შემთხვევაში, თუ განაცხადის გაკეთებამდე მას „მობიტელთან“ არ ჰქონდა არანაირი სამართლებრივი ურთიერთობა წინამდებარე მოწვევის ოფერტით განსაზღვრულ მომსახურებაზე ან/და განმცხადებლის მიერ არაჯეროვნად სრულდებოდა „მობიტელის“ წინაშე ნაკისრი ფინანსური ვალდებულებები.

6.5. განმცხადებლის მიმართვიდან 3 სამუშაო დღის ვადაში “მობიტელი” შეისწავლის აკმაყოფილებს თუ არა განმცხადებლის მიერ წარმოდგენილი დოკუმენტაცია და წერილობითი განცხადება 6.2 და 6.3 პუნქტებში დაფიქსირებულ მოთხოვნებს. თუ კი განმცხადებელი ვერ აკმაყოფილებს ხსენებული პუნქტებით დაფიქსირებული რომელიმე მოთხოვნიდან ერთ-ერთს ან/და გააჩნია დავალიანება “მობიტელის” მიმართ, მას ეცნობება ამის შესახებ და ჩაითვლება რომ განმცხადებლის მიერ აქცეპტი არ გაკეთებულა.

6.6. თუ განმცხადებელი აკმაყოფილებს 6.2 და 6.3 პუნქტებით გათვალისწინებულ მოთხოვნებს, მას განაცხადის და დოკუმენტაციის ჩაბარებიდან 10 სამუშაო დღის ვადაში გადაეცემა ურთიერთჩართვის ხელშეკრულების პროექტი ან/და ელექტრონული სახით გადაეგზავნება მის მიერ მითითებულ მისამართზე.

7. ძირითადი ქსელის საკომუნიკაციო ტერმინალურ ელემენტებთან დაშვებისა და ურთიერთჩართვის მომსახურების მიწოდების თაობაზე ხელშეკრულების გაფორმების ვადა

მოწვევის ოფერტაზე მსურველი პირის მიერ განაცხადის წარმოდგენის თარიღიდან – 20 კალენდარული დღე

8. ძირითადი ქსელის საკომუნიკაციო ტერმინალურ ელემენტებთან დაშვებისა და

ურთიერთჩართვის მომსახურების მიწოდებასთან დაკავშირებული რესურსებისა და დამატებითი სიმძლავრეების გამოყოფის პროცედურები და პირობები

დამატებითი სიმძლავრე შეიძლება გამოეყოს მხოლოდ ურთიერთჩართულ ოპერატორს. ასეთი მოთხოვნა წარმოდგენილი უნდა იქნეს წერილობითი ფორმით, შესაბამისი დასაბუთებით (მათ შორის, ტრაფიკის ანალიზი).

9. ძირითადი ქსელის საკომუნიკაციო ტერმინალურ ელემენტებთან დაშვებისა და ურთიერთჩართვის მომსახურების მიწოდებასთან დაკავშირებული რესურსებისა და დამატებითი სიმძლავრეების გამოყოფის ვადა

დამატებითი სიმძლავრის გამოყოფის ვადაა მოთხოვნიდან 10 კალენდარული დღე. ეს ვადა იმოქმედებს იმ შემთხვევაში, თუ დამატებითი სიმძლავრის უზრუნველყოფა არ მოითხოვს არსებულ ქსელში ტექნიკური საშუალებების დამატებას.

10. თანალოკაციის ფართით სარგებლობის პირობები

თანალოკაციის ფართით სარგებლობის შესახებ „მობიტელ“-სა და მსურველ ავტორიზებულ პირს შორის ფორმდება შესაბამისი ხელშეკრულება. ავტორიზებული პირისათვის თანალოკაციის ფართით გამოყოფის საფუძველია მხარეებს შორის მოქმედი ურთიერთჩართვის ხელშეკრულება და ტერმინალის განთავსების ორმხრივად შეთანხმებული სქემა. აპარატურის განთავსების, აგრეთვე აპარატურის მოხსნის შემთხვევაში მხარეთა შორის ფორმდება მიღება-ჩაბარების აქტი.

თანალოკაციის ფართზე ურთიერთჩართვის აპარატურის განთავსების პირობებია:

- ა) ურთიერთჩართვისათვის გამოყენებული ტერმინალი (შიდა ბლოკი). უნდა თავსდებოდეს სტანდარტულ 19 დიუიმიან დგარზე, ხოლო მისი სიმაღლე და სიგრძე არ უნდა აღემატებოდეს 40სმ-ს;
- ბ) მოხმარებული ელექტროენერჯის სიმძლავრე არ უნდა აღემატებოდეს 150 ვტ-ს;
- გ) „მობიტელი“ უზრუნველყოფს მუდმივი დენის გარანტირებულ ელექტროკვებას -48 ვოლტი ძაბვით, აგრეთვე თანალოკაციის ფართის სათანადო კონდიციონებას.

იმ შემთხვევაში, თუ ურთიერთჩართვის განხორციელებისთვის თანალოკაციის ფართის მსურველ ავტორიზებულ პირს ესაჭიროება რადიოსარგებლო კავშირის ორგანიზება, მას „მობიტელ“-ისანადაზე თბილსსა და ბათუმში გამოეყოფა ფართი ანტენის დამონტაჟებისათვის, კერძოდ: თანალოკაციის ფართის მიმდებარე ტერიტორიაზე განთავსებულ ანადაზე არაუმეტეს 0,6მ დიამეტრის პარაბოლური ანტენის განთავსებისთვის.

თანალოკაციის ფართზე დაშვების პირობები:

- ა) თანალოკაციის ფართზე ავტორიზებული პირის წარმომადგენელი დაიშვება მხოლოდ „მობიტელ“-თან შეთანხმებით და „მობიტელ“-ის ან „მობიტელ“-ის შესაბამის კონტრაქტორის წარმომადგენლის თანდასწრებით;
- ბ) ინფორმაცია დაშვების ყოველი შემთხვევის შესახებ აღირიცხება სპეცილურ ჟურნალში, რომელშიც მიეთითება ავტორიზებული პირის წარმომადგენლის სახელი და გვარი, პირადი ნომერი, წარმომადგენლობის დამადასტურებელი დოკუმენტის დასახელება, ნომერი და თარიღი, დაშვების მიზანი, შესრულებული სამუშაო. ჩანაწერი დასტურდება „მობიტელ“-ის წარმომადგენლისა და თანალოკაციის ფართზე დაშვებული პირის ხელმოწერით.

თანალოკაციის ფართით სარგებლობის, ელექტროენერგიით უზრუნველყოფის, კონდიციონერებისა ანტენის განთავსების საფასური შეადგენს თვეში 150 (ასორმოცდაათი) ლარს, დღე-ს ჩათვლით.

11. ექსტრაორდინალურ და ფორს-მაჟორულ შემთხვევებთან დაკავშირებული პირობები და მხარეთა ურთიერთვალდებულებები

11.1. „მობიტელ“-მა და მასთან ურთიერთჩართულმა ოპერატორმა 10 სამუშაო დღით ადრე უნდა შეატყობინონ ერთმანეთს მათი ქსელის სარემონტო ან სხვაგვარი სამუშაოების ჩატარების შესახებ, რამაც შეიძლება გამოიწვიოს ურთიერთჩართვის ტრაფიკის გატარების შეფერხება.

11.2. მხარეებმა დაუყოვნებლივ უნდა შეატყობინონ ერთმანეთს მათი ქსელის ყველა იმ დაზიანების შესახებ, რამაც შეიძლება გავლენა მოახდინოს ურთიერთჩართვის მომსახურების მიწოდებაზე და შესთავაზოს ალტერნატიული გზები ტრაფიკის გასატარებლად, ასეთის არსებობის შემთხვევაში.

11.3. მხარეები თავისუფლდებიან პასუხისმგებლობისაგან მათ მიერ ნაკისრი ვალდებულებების სრული ან ნაწილობრივი შეუსრულებლობისათვის დაუძღვევლი ძალის მოქმედების შემთხვევაში, რომლის დროსაც შეუძლებელია ხელშეკრულებით გათვალისწინებული ვალდებულებების შესრულება.

11.4. “დაუძღვევლი ძალის” ქვეშ იგულისხმება ნებისმიერი გარემოებები, რომლებიც არ არსებობდნენ ხელშეკრულების დადების დროს და რომელთა დადგომა თუ ზემოქმედება მხარეებს არ შეეძლოთ თავიდან აეცილებინათ და გადაეღახათ.

11.5. დაუძღვევლი ძალის გარემოებებს მიეკუთვნება სტიქიური უბედურებები (წყალდიდობა, მიწისძვრა, დიდთოვლობა და სხვა), აფეთქებები (მათ შორის ტერორისტული თუ დივერსიის აქტები), საომარი მოქმედებები (მათ შორის სამოქალაქო არეულობები და გაფიცვები), ხელისუფლების ისეთი აქტები, რაც არსებითად აფერხებს მხარეთა მიერ ნაკისრი ვალდებულებების შესრულებას და სხვა.

11.6. თუ ზემოხსენებულმა გარემოებებმა უშუალოდ იმოქმედეს ხელშეკრულებით ნაკისრი ვალდებულებების შესრულების ვადებზე, მაშინ ეს ვადები ამ გარემოებების მოქმედების დროის თანაბარზომიერად გაიზრდება. მხარემ, რომლისთვისაც ფორს-მაჟორული გარემოებების დადგომის გამო შეუძლებელი გახდა ვალდებულების შესრულება, ვალდებულია დაუყოვნებლივ, მაგრამ არაუგვიანეს 7 (შვიდი) კალენდარული დღისა ამ გარემოებების დადგომიდან ან დასრულებიდან, შეატყობინოს მეორე მხარეს წერილობით.

12. “მობიტელის” ძირითადი ქსელის საკომუტაციო ტერმინალურ ელემენტებთან დაშვებისა და ურთიერთჩართვის (სატელეფონო ზარების წამოწყება/დასრულების) მომსახურების მიწოდების შესაბამისი ხელშეკრულებების მოქმედების ვადა და შეწყვეტის პირობები

12.1. 4.1.2 და 4.1.3 პუნქტების მიხედვით განსაზღვრულ პირებთან ურთიერთჩართვის ხელშეკრულების მოქმედების ვადა:

12.1.1. ხელშეკრულება მოქმედებს ავტორიზებული პირის მიერ ავანსის სახით გადახდილი თანხის ამოწურვამდე. ყოველგვარი გაუგებრობის გამოსარიცხად, აღნიშნული მოიაზრებს იმ შემთხვევას, როდესაც ავტორიზებული პირის მიერ ავანსის

სახით გადახდილი თანხა მთლიანად იქნება გახარჯული „მობიტელის“ მიერ გაწეულ მომსახურებაში;

12.1.2. ხელშეკრულება მოქმედებს იმ ვადამდე, სანამ ავტორიზებული პირის მიერ წარდგენილი საბანკო გარანტიით განსაზღვრული თანხის ოდენობა არ გაუტოლდება „მობიტელის“ მიერ გაწეული მომსახურების ღირებულებას და გაწეული მომსახურების ღირებულება არ არის გადახდილი ავტორიზებული პირის მიერ.

12.2. ხელშეკრულების მოქმედების ვადის გასვლა იწვევს ავტორიზებულ პირთან ურთიერთჩართვის გაუქმებას, რაც ხორციელდება ყოველგვარი დამატებითი გაფრთხილების გარეშე.

12.3. ხელშეკრულების შეწყვეტა ხორციელდება საქართველოს მოქმედი კანონმდებლობით დადგენილი წესითა და საფუძვლებით.

13. მოწვევის ოფერტის მოქმედების ვადა

მოწვევის ოფერტის მოქმედების ვადაა – 2016 წლის 20 თებერვლამდე.